

ՀԱՅՈՑ ՑԵՂԱՍՊԱՆՈՒԹՅԱՆ 100-ՐԴ ՏԱՐԵԼԻԳԻ ՆՎԻՐՎԱԾ ՀԻՇԱՏԱԿԻ ՊԱՏԱՐԱԳ ՎԱՏԻԿԱՆՈՒՄ

2015 թ. ապրիլի 8-12-ին տեղի ունեցավ ՀՀ նախագահ Սերժ Սարգսյանի գլխավորած պատվիրակության պետական-պաշտոնական այցը Իտալիայի Հանրապետություն: Այն դարձավ իրապես պատմական: Այցելության պաշտոնական մասն ընդգրկում էր մի շարք հանդիպումներ և արարողակարգային միջոցառումներ: Հանրապետության նախագահը ապրիլի 9-ին ծաղկեպսակ դրեց Անհայտ զինվորի հուշարձանին, ապա հանդիպեց Իտալիայի Հանրապետության նախագահ Սերջիո Մատարելլայի հետ: Առանձնակի խորհուրդ հաղորդվեց այն հանգամանքին, որ այս հանդիպումը տեղի է ունենում Հայոց ցեղասպանության 100-րդ տարելիցի ոգեկոչման նախօրեին: Ս. Սարգսյանը ապրիլի 9-ին հանդիպեց նաև Իտալիայի պատգամավորների պալատի նախագահ Լաուրա Բոլդրինիի և Իտալիայի սենատի նախագահ Պիետրո Գրասսոյի, ինչպես նաև Հռոմի քաղաքապետ Իգնացիո Մարինոյի հետ: ՀՀ նախագահն այնուհետև այցելեց «Վիտտորիանո» թանգարանային համալիր, ուր դիտեց «Հայաստան-տապանի ժողովուրդ» ցուցահանդեսը, որտեղ ցուցադրվում են Հայաստանի պատմությանն ու Իտալիայում հայերի ներկայությանը վերաբերող նյութեր և ցուցանմուշներ: Այստեղ ներկայացված են նաև Հայոց ցեղասպանությանը վերաբերվող նյութեր: Այս ցուցահանդեսով սկսվեցին Հայոց ցեղասպանության 100-րդ տարելիցին նվիրված միջոցառումներն Իտալիայում:

Ապրիլի 11-ին Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսը Իտալիայի Նեապոլ քաղաքում ՀՀ նախագահ Սերժ Սարգսյանի և Ն.Ս.Օ.Տ.Տ. Արամ Ա Մեծի Տանն Կիլիկիո Կաթողիկոսի

հետ միասին մասնակցեց Ս. Գրիգոր հայի եկեղեցում կազմակերպված արարողություններին:

Ս.Գրիգոր հայի վանական համալիրում Ամենայն Հայոց Կաթողիկոսին, ՀՀ նախագահին և Մեծի Տանն Կիլիկիո Կաթողիկոսին դիմավորեցին Նեապոլի արքեպիսկոպոս կարդինալ Կրեշենցիո Սեպեն, Կամպանիայի նահանգապետ Ստեֆանո Կալոբրոն, Նեապոլի քաղաքապետ Լուիջի դե Մաջիստիսը և մենաստանի միանձնուհիները:

Այստեղ տեղի ունեցավ եկումենիկ արարողություն, որի ժամանակ Հայաստանյայց Առաքելական և Կաթոլիկ Եկեղեցիների սպասավորները միասնական աղոթք բարձրացրեցին աշխարհում խաղաղության, հայ և իտալացի ժողովուրդների բարեկամության և բարօրության համար:

Արարողությունից հետո վանքի ներսում տեղի ունեցավ Հայոց ցեղասպանության հուշակոթող-խաչքարի բացման և օծման արարողությունը: Այս խաչքարը կրկնօրինակն է Ջուդայի բարբարոսաբար ոչնչացված խաչքարերից մեկի: Ցեղասպանության ոգեկոչման համար որպես հուշակոթող ընտրված Ջուդայի նման գեղեցկահյուս խաչքարը խորհրդանշում է, որ Հայոց ցեղասպանությունը որպես չպատժված հանցագործություն այժմ իր ավերները շարունակում է նաև Ադրբեջանի կողմից իրականացվող մշակութային ցեղասպանությամբ:

Արարողությունից հետո վանքում կազմակերպված հանդիսության ժամանակ ելույթ ունեցավ Ս. Սարգսյանը՝ կարևորելով եկումենիկ արարողությունը և խաչքար-հուշարձանի բացումը հարյուրամյակի ոգեկոչման համատեքստում:

Բարձր գնահատելով հայ և իտալացի մի շարք մշակութային, քաղաքական և տնտեսական գործիչների հայ-իտալական կապերի ամրապնդման և հայանպաստ գործունեության համար, Հանրապետության նախագահը նրանց հանձնեց պետական բարձր պարգևներ: Նեապոլի քաղաքապետ Լուիջի դե Մաջիստրիստն իր հերթին Ս. Սարգսյանին պարգևատրեց Նեապոլ քաղաքի շքանշանով:

Եկեղեցու Ս. Գրիգորի մատուռի երկու պատերին Լուսավորչի վիրապից ելնելը և քարոզությունը ներկայացնող մեծադիր երկու կտավներն են՝

կատարված իտալական Վերածնության վարպետների աշակերտների կողմից 17-18-րդ դարերում:

Նեապոլում պահվող մասունքների համար ասվում է, թե դրանք Պոլսից փոխադրվել են Կոստանդին VI Կոպրոնիմոս կայսրի (վիճ. 775 թ.) պատկերապաշտների դեմ հարուցած հալածանքների ժամանակ:

Նրանք Նեապոլում հիմնում են նոր կուսանոց, որը գործում է մինչև այսօր: Մենաստանին կից գտնվում է Ս. Գրիգոր Լուսավորիչ եկեղեցին, ուր և պահվում են Ս. Գրիգորի Կ. Պոլսից բերված նշխարները: Ի հիշատակ Արևելքից եկած և այս մենաստանը հիմնած կույսերի, եկեղեցու մուտքին կան երեք նկարներ: Առաջինում նավով Նեապոլ եկող միանձնուհիներն են պատկերված: Երկրորդում՝ նրանք իրենց հետ բերում են Ս. Գրիգորի մասունքները կրող աճյունասափորը: Երրորդ նկարում կույսերն ափ են իջնում Նեապոլում, և մայրապետը մասունքներն ամփոփող աճյունասափորը հանձնում է նեապոլցիներին:

Նեապոլ Ս. Գրիգորի մասունքների բերման և ընդհանրապես սրբի մասին գիրք է գրել այս մենաստանի մայրապետներից Մարիա Բոնուկիեն: Գիրքը լույս է տեսել 1717 թ.: Գրքի հայերեն թարգմանությունը՝ «Պատմություն կենաց, մարտիրոսության և սքանչելեաց Սրբոյն Գրիգորի» Վենետիկի Մխիթարյանները տպագրել են 1737 թ.: Այս գրքում ասվում է, որ Հայաստանից շատ ուխտավորներ են գալիս իրենց խոնարհումը բերելու սրբի մասունքներին:

Ֆրանցիսկոս Պապը ապրիլի 12-ին Հռոմի Ս. Պետրոսի տաճարում մատուցեց Ս. Պատարագ: Հռոմի Սրբազան քահանայապետը Հայոց Մեծ Եղեռնն անվանեց քսաներորդ դարի առաջին ցեղասպանություն, իսկ Ս. Պատարագին նախորդած հատուկ արարողությամբ Ս. Գրիգոր Նարեկացին դասվեց Հռոմեական եկեղեցու կողմից Տիեզերական անվանվող վարպետների շարքը:

Ապրիլի 12-ին Վատիկանի Ս. Պետրոսի տաճարում, Ֆրանցիսկոս Պապի մատուցած Պատարագը իրապես պատմական դարձավ: Ս. Պատարագի սկզբում Հայոց եկեղեցու սրբերից և մեր ժողովրդի գրական մեծություններից Գրիգոր Նարեկացին դասվեց Հռոմեական եկեղեցու կողմից Տիեզերական անվանվող վարպետների շարքը: Այս արարողության սկզբում

կաթոլիկ եկեղեցու բարձրաստիճան հոգևորականները համապատասխան վկայություններ և փաստարկներ բերեցին՝ հավաստելու համար Նարեկացուն այդ վարդապետների շարքը դասելը, ինչպես նաև թվարկեցին եկեղեցական տարբեր համայնքների դիմումները, որոնք նույն խնդրանքն ունեին, որից հետո հանդիսավորապես ընդունված ծիսակարգով կատարվեց այդ արարողությունը:

Գրիգոր Նարեկացուն կաթոլիկ եկեղեցու վարդապետների շարքը դասելը նշանակալից էր մի քանի առումով: Նարեկացին այս շարքում 36-րդն է: Երկրորդ՝ քույր եկեղեցիների Տոնացույցում սրբադասվել, ինչպես նաև այդ եկեղեցիների կողմից կանոնացվել են մյուս եկեղեցիների այն հոգևորականները, ովքեր պատկանել են Ընդհանրական եկեղեցու մինչև V դարն ընկած շրջանին:

Լինելով X դարի հեղինակ, Նարեկացին հետևեց ոչ թե արդեն գոյություն ունեցող դավանական բաժանումներին, այլ համաքրիստոնեական գաղափարներին, որով հռչակված էր ոչ միայն որպես գրական եզակիորեն մեծարժեք ստեղծագործության հեղինակ, այլև որպես համաքրիստոնեական և համամարդկային գաղափարների արծարծող, ով գրել է այն ամենի մասին, ինչը միացրել և ոչ թե բաժանել է մարդկանց:

Ս. Պատարագի ընթացքում Հռոմի քահանայապետը հայ ժողովրդին անվանելով առաջին քրիստոնյա ժողովուրդ, Հայոց Մեծ Եղեռնը դիտարկեց մարդկության պատմության վերջին հարյուրամյակի ընդհանուր համատեքստում որպես XX դարի առաջին ցեղասպանություն:

Սկսված XXI դարը Պապը բնորոշեց որպես երրորդ համաշխարհային պատերազմի ժամանակաշրջան, որն ընթանում է աշխարհի տարբեր կողմերում բռնկվող պատերազմներով, որոնք էլ իրենց հերթին ածանցված են քսաներորդ դարից փոխանցված իրողություններից: Պապը քսաներորդ դարի որպես երեք մեծ ողբերգություններ անվանեց Հայոց ցեղասպանությունը, ֆաշիզմը և ստալինիզմը:

Նման ձևակերպմամբ Հռոմի քահանայապետը Հայոց ցեղասպանությունը համարեց ոչ միայն հայ ժողովրդի, այլև ողջ մարդկության ողբերգությունը, այն դիտարկելով XX դարի իրար փոխկապակցված ողբերգությունների համատեքստում: Պապը ընդգծեց նաև, թե Հայոց ցեղասպանության

ոգեկոչումը միայն պատմական նշանակություն չունի և միայն անցյալի համար չէ, որ կատարվում է, այլ որպեսզի կանխվեն հետագա ոճրագործությունները: Պապի բնորոշմամբ. «Կարևոր է, և հիրավի մեր պարտքն է հարգել նրանց հիշատակը, քանի որ երբ հիշողությունն է մարում, չարիքն այդ վերքերը նորոգում է: Թաքցնել կամ ժխտել չարիքը, նշանակում է արնաքամ անել վերքը առանց վիրակապելու»:

Ի հիշատակ Հայոց Մեծ Եղեռնի նահատակների հոգիների Ս. Պատարագի ավարտին հայկական ծեսով կատարվեց հոգեհանգստյան արարողություն: Ոգեկոչելով մեր նահատակների հիշատակը և դատապարտելով աշխարհում կատարվող բոլոր ցեղասպանությունները Հոգեհանգստյան կարգի ժամանակ խոսք ասացին Ամենայն Հայոց և Մեծի Տանն Կիլիկիո Կաթողիկոսները,:

Ս. Պատարագից հետո ՀՀ նախագահ Սերժ Սարգսյանը առանձնազրույց ունեցավ Ֆրանցիսկոս Պապի հետ:

Ս. Պետրոսի տաճարում մատուցված պատարագը և Պապի խոսքը ցույց տվեցին, որ աշխարհը միայն նյութական շահի վրա չէ, որ հիմնված է և կա նաև բարոյական աշխարհը, որը թելադրում է իր բարոյական արժեհամակարգը:

Հռոմի Պապի խոսքը մի նոր աստիճանի բարձրացրեց հայկական ցեղասպանության միջազգայնորեն ճանաչման և դատապարտման գործընթացը, իսկ Գրիգոր Նարեկացու սրբադասումը գնահատելի է հայոց հոգևոր հարուստ մշակույթը աշխարհին առավել ճանաչելի դարձնելու առումով:

Ս. Պետրոսի տաճարում Նարեկացու համար հնչած բանաձևումներն ու ձևակերպումները հնարավորություն են տալիս հայ հոգևոր մշակույթը ներկայացնելու միջնադարյան ունիվերսալիզմի շրջանակում, վեր հանելու մեր միջնադարյան մատենագրության մեջ եղած համաքրիստոնեական և համամարդկային հնչեղություն ունեցող արժեքները և դրանք ներկայացնել աշխարհին որպես բարոյական աստվածաբանության դրսևորումներ՝ դրված գեղարվեստական բարձրարժեք ձևերի մեջ, ինչպես որ այսօր ընկալվում և արժևորվում են Եփրեմ Ասորու և Հովհան Ոսկեբերանի ստեղծագործությունները:

Նարեկացին անվանվում է հազարամյակի բանաստեղծ, ոչ թե այն պատճառով, որ Նարեկը գրվել է երկրորդ հազարամյակի սկզբին, այլ նրանում արծարծված գաղափարները կենսունակ են եղել ողջ հազարամյակի ընթացքում: Նարեկացուն հռոմեական եկեղեցու վարդապետների շարքը դասելը գալիս է վկայելու, որ Նարեկա վանքի տուրքը երրորդ հազարամյակում ևս շարունակելու է մնալ հազարամյակի բանաստեղծը:

Նարեկացու և Նարեկա դպրոցի միջոցով հարգանքի տուրք մատուցվեց Վասպուրական ու ողջ Արևմտահայ աշխարհին, որը մինչև 1915 թ. ցեղասպանության իրականացումը բազում մնայուն և անանց արժեքներ է տվել համաշխարհային քաղաքակրթությանը: